

qual molto desidera esser onorato, et siali fata la cena per la sera, poi siali dato ogni zorno ducati 20 per le spexe, fin el starà qui. Ave 111 de si, 66 de no, 3 non sincere. Non fo preso, perchè dando danari de la Signoria, vol haver i tre quarti, overo i tre quinti; et il Colegio se doveva non se dovesse honorar questo Cardenal qual ha fato bon officio, e in concistorio et in Spagna per questo Stado etc.

191\* Et Io Marin Sanudo, è di la Zonta, andai dai Savi a dir metesse darli el Bucintoro et farli le spese *solam* quella sera, che la saria presa. Laudono la mia opinione et fu posta *iterum* per tutti di Colegio, excepto mo sier Michiel Salamon el consier, che non si mosse di opinion, e li do altri Consieri non voleva introno, et fo coreta la parte al modo predito che aricordai, et fu presa: 136 de si, 38 de no.

Et de la prima parte fo comandà grandissima credenza, e dato sacramento per l'Avogador a la porta; et è ben fato aziò dito Cardenal non intenda, et per Colegio li darano ducati 20 et più fin 25 al zorno, che lo poleno far, per spexe.

Nota. Molti non voleva darli el Bucintoro perchè al cardenal di Montibus non fu dato, aziò non l'avesse a mal; *tamen* questo è stà Legato a latere dil Papa in Spagna, ha bon nome in corte e *de facili* potria esser Papa. Questo *alias* dil . . . predicoe come frate in San Stephano; vien qui per far Zeneral maestro Gabriel veneto, qual l'ha fato vicario zeneral di l'Ordine et di Roma è zà zonto de qui.

Fu posto, per li Consieri, Cai di XL, loro Savii, una parte zercha l'estimo di Padoa, *videlicet: cum sit* che a di 29 di Marzo passato fusse preso di scuoder el resto de la daja di Padoa, dil 1514 fin 1518, e sia tolto uno exator per la comunità *ut in ea*; la qual daja dil 1514, 1515, 1516 fo butà a pizoli 20 per lira e non pizoli 24 come si soleva butar, *ita* che era lire 50864 pizoli uno ogni anno la daja, et a pizoli 10 vien esser debitori per L. 44018, però sia preso, a requisition di oratori di dita comunità, li sia remesso quel di più, et cussì si scuodi fin primo Lujo presente, e l'exator sia ubligato ogni do mexi dar in Camera ducati 1000 comenzando far la prima paga a di primo Avosto, come diti oratori hanno suplichado, con altre clausole, e sia disfalchè di questo debito quello ha auto il Flisco e quelli si sfalcò a rason di 8 per 100. *Item*, sia dato di più a l'exator predito ducati 100 a l'anno, da esser disfalchati di quello che 'l prefato dia pagar in Camera: 125, 28, fu presa. Nota, lo exator è domino Antonio Caodivacha cavalier etc.

Fu posto, per li ditti, che la daja nuova si scuodi

da primo Lujo fin tutto Decembrio, li debitori habino tempo di pagarla come ha suplicà li diti oratori de la comunità di Padoa, però sia scritto a li rectori semo contenti compiacerli di termene per questi 6 mexi. *Item*, si atendi a scuoder i debitori vechi de la daja 1410 *ut in parte*: 156, 10, fu presa.

1519 Die 5 Junii in Majori Consili.

192

Non se die pretermeter che 'l si possa far de obviar a li disordini et inconvenienti che si cometono per alcuno de li officii nostri et contra il debito de justitia, et in detrimento et fraude de private persone, sicome al presente si vede seguire da bon tempo in qua ne l'officio di Sopraconsoli si cerca li sobrabondanti, quali vanno in sinistro, et questo tutto a danno dei poveri, come *etiam* cerca la fraude che si comette nel domandar de le fide, over salviconduti; et però:

L'anderà parte, che, salve et confirmate le parte sopra di ciò prese, et a la presente non repugnanti, sia, per autorità de questo Consejo, preso et statuito, che li Cassieri de l'officio nostro di Sopraconsoli presenti et futuri, siano obligati servar questo ordine, di tener sopra uno libro separato, distinto et particolare conto di cassa in cassa; et el scrivano sopra uno altro libro per scontro, notar tutti li danari sobrabondanti che si atrovino ne le mano, et che ne l'advenire se atroverano de li pegni venduti, et che si venderano; et sempre ad ogni requisitione prontamente restituirli a chi spettino; et compita la cossa debba il Cassiere fra termene de zorni 8 *immediate* sequenti haver consegnato al successor suo tutto el danaro che havera scosso di tal raxon, soto le pene di furanti; et sia tenuto el scrivano de tempo in tempo aricordar a li Cassieri questo ordine, a fine che lo habiano inviolabilmente ad osservare; et quelli che contrafarano *immediate* portar debitori a Palazzo de ducati cinquanta, sotto la istessa pena di ducati 50, per ogni volta, da esserli tolta per cadaun Avogador, over capo di XL, senza altro Consejo.

De li danari veramente sobrabondanti soprascritti non si possa tener, ne l'officio preditto, più che fino a la summa de ducati 10 solamente; ma reponer quelli debano per più securtà ne l'officio di Camerlengi de Comun, in una cassa separada, tenendo le chiave essi Cassieri, altramente facendo, se 'l ne seguirà furto o altro danno, siano tenuti refar li Cassieri del suo; et habia esso scrivano soldo uno per cadaun pegno da ducati cinque in suso che ha-